

Orang ramai diminta jangan beli gula berlebihan

KUALA LUMPUR, Ahad — Datuk Seri Dr. Mahathir Mohamad hari ini menyeru orang ramai jangan membeli gula lebih dari biasa kerana jika tidak kekurangan gula akan terus berlaku.

Timbalan Perdana Menteri menegaskan, di samping ada kegiatan sindiket menyeludup gula, perbuatan membeli gula berlebihan juga

menyebabkan kekurangan serius yang berlaku sekarang.

"Perbuatan membeli gula berlebihan ini mesti dihentikan segera di samping Kerajaan berusaha menjalankan penyiasatan rapi berhubung dengan kekurangan ini," tegas Datuk Seri Dr. Mahathir yang juga Menteri Perdagangan dan Perindustrian

kepada Berita Harian pagi ini.

Kekurangan gula dilaporkan berlaku di seluruh negara terutama negeri-negeri yang bersempadan dengan Thailand seperti di Perlis, Kedah, Perak dan Kelantan.

Gula yang selalu boleh dibeli dengan mudah tetapi kini sukar untuk dibeli dan jika ada sekali pun hanya dibenarkan membeli antara satu hingga dua kati.

Disiasat

Datuk Seri Dr. Mahathir menegaskan, penyiasatan terhadap sindiket penyeludupan gula sedang dijalankan dan "Saya optimis sindiket itu akan dapat dihapuskan sedikit masa lagi," katanya.

Berita Harian difahamkan Kerajaan sedang meneliti rangkaian gula-gula itu didedar dari kilang sehingga dijual secara runcit.

Ada teori-teori yang menyebut bahawa sindiket penyeludupan di negara jiran itu dapat kerjasama dari orang tertentu pembekal gula.

Harga gula di Thailand sekarang antara \$1.40 hingga \$1.50 berbanding dengan Malaysia 75 sen sekati.

Dengan demikian menjual gula di Thailand lebih menguntungkan lagi dan ini menggalakkan penyeludupan secara kecil-kecilan di sempadan.

Datuk Seri Dr. Mahathir mengulangi bahawa sikap tidak membeli gula berlebihan sahaja akan dapat menolong menyelesaikan masalah kekurangan sekarang.

"Jika sikap menyimpan gula berlebihan maka sudah tentu bekalan gula berkurangan dan ini akan terus berlaku," tegasnya lagi.

Bahan asal dari Arkib
Negara Malaysia